

Communicaziun als meds da massa – Cussegl dal public SRG.R

La bova da Bondo – RTR ha mussà engaschi extraordinari

Mustér, ils 27-11-2017

En si 'ultima seduta da l'onn 2017 ha il Cussegl dal public SRG.R analisà las reportaschas da la bova da Bondo, il project HelveCHia ed ils videos da novitads online. Il resultat da l'analisa: reportaschas da Bondo èn reussidas, HelveChia pudess sa fatschentar cun tematicas anc pli relevantas e laud per ils videos online.

Gist la situaziun nunusitada en la Bregaglia ha pretendì da las redacziuns involvidas d'ina vart in engaschi nunstanclentaivel durant di e notg e da l'autra vart fins sensoris ed empatia. Star en il lieu da catastrofa, esser in tant pertutgà e tuttina rapportar a moda objectiva e fundada è ina sfida betg quotidiana ch'è – tenor il Cussegl dal public SRG.R – reussida a RTR. Ils trais vecturs radio, televisiun ed online han rapportà a moda actuala, detagliada ed autentica. Il public ha adina pudì far in maletg cumplet da quai che curra e passa al lieu da catastrofa.

HelveCHia

HelveCHia, quai èn contribuziuns che rapportan ina giada l'emna a moda equilibrada da las ulteriuras parts da la Svizra. Questas reportaschas èn da chattar sin rtr.ch. Il Cussegl dal public SRG.R remartga che questa purschida è anc pauc enconuschenta a l'auditori. La schelta e variaziun dals temas na persvada betg adina, i manca qua e là la relevanza. La qualitat ed il cuntegn satisfan dentant per gronda part. Grond laud retschaiva la pagina d'internet da HelveCHia. La charta geografica interactiva dat ina stupenta survista e gida a chattar las contribuziuns tenor regiun.

Videos da novitads online

Videos da novitads online remplazzan pli e pli fitg las novitads usitadas cun text e fotografia sin ils portals electronics da las medias. Quai trend pon ins percorscher era tar RTR. Las contribuziuns digitalas producidas a moda professiunala rapportan en furma curta e cumpacta davart il pli necessari ed

impurtant. Il layout unitar gida il public da sa sentir da chasa. La qualidad, en spezial las visualisaziuns, chattan grond laud tar il Cussegl dal public SRG.R. Ils texts accompagnants en ils videos augmentan la chapientscha e correspundan a la nova moda e maniera d'infurmar e da divertir, spezialmain en las raits socialas. RTR va cun il temp e dat senza difficultads dumogn a questa sfida actuala da la digitalisaziun.

In sguard en il futur

Enfin la proxima seduta dals 21 da favrer 2018 prenda il Cussegl dal public sut la marella la qualidad dal linguatg pledà e scrit da RTR. Ina terza gruppa vegn a sa fatschentar cun il di dal clima 2017 che vegn emess ils 29 da november la saira sin tuttas unitads da la SRG SSR.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevisiun Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79